

Prome di Juli proximo “Beach Policy” ta keda oficialmente introduci

Minister Otmar Oduber a reuni cu tur entidad involvi

ORANJESTAD (AAN): Prome di Juli proximo Beach Policy ta keda oficialmente introduci.

Despues cu hopi preparacion a tuma luga durante e ultimo 2 añanan awor ta asina leu cu ta cla pa ehecuta Beach Policy. Recientemente den Consejo di ministronan a keda palabra entre e mandatarionan cu e responsabilidad ta cay primordialmente pa e cartera di turismo, mirando e importancia cu esaki tin pa e sector aki. A reuni e ultimo 3 simannan cu DIP, e comisionan encarga for di ministerio di turismo y oficina di turismo. Di aranson mainta tur e ‘stakeholders’ cu ta esnan cu directamente lo hiba e control riba e beachnan y tambe den lama, a reuni unda a palabra cu pa prome di juli 2016 control ta cuminsa. E maneho nobo aki lo basa riba e rapportnan y sugerencianan cu a worde haci cu a keda aproba den Consejo di ministronan pa locual ta trata regulacion di actividadnan tanto riba beach como den lama. Minister Otmar Oduber ta mostra cu e maneho aki ta traduci den controlnan mas estricto. Esaki ta conta por ehempel pa deporte acuatico cu ta eherce nan funcion riba lama of riba beach. Sr.



Oduber ta di opinion si cu gran mayoria ta opera den un forma hopi bon pero tin tambe cu ta opera den un sistema menos bon, y no por descarta e grupo minimo cu lo kier mira un mehoracion pronto den nan forma di opera. Tambe tin e hotelnan cu lo mester bay tene nan mes na e reglanan nobo cu ta worde implementa. Ultimo añanan pa por complace nan huespednan cu adkisiionnan innovativo hopi ta e hotelnan cu a expande nan servicionan a costo di nos beachnan. Cu implementacion di e Beach Policy awor tur palapanan cerca di lama, barnan cu a worde construi of kiosconan cu actualmente no ta traha na e

lugar corecto lo mester reubicanan den e areanan designa.

Minister ta segura cu dentro di poco ta cuminsa un campaña di conscientisacion cu lo muestra comunidad kico lo ta e cambionan y proceso cu ta bay tuma luga, caminda di awor pa prome di juli tur hende ta opera segun e Beach Policy. Ta un grupo grandi cu a forma un laso hopi estrecho pa por logra implementacion di e Beach Policy. Ta trata aki di entre otro DIP, Ministerio di Turismo y ATA hunto cu e ‘stakeholder’ manera DOW, Maretime Politie, Strand Politie y Directie Scheepvaart. Regulacion riba nos beachnan ta di suma importancia pa nos man-



tene Producto Aruba di un nivel haltu. No ta un secreto cu ultimo tempo nos beachnan specialmente den e area di Palm Beach a bira demasiado congestionada y cu e cantidad grandi di bishitantenan di e barconan crucero el a bira un situacion cu tabata urgi atencion. No tabatin un plan integral y tabata tin hopi negoshinan cu tabata opera pa hopi aña sin permiso. Tur esaki a conduci cu mester a tuma tempo necesario y legalmente laga e cana e proceso pa despues informa esnan involucra cu tin un cambio na caminda pa regula e area di nos beachnan. Pa 2 aña caba a conduci varios encuentro pa informa y a publica cu e cambio ta

bin unda cu por bisa di a sinti un sosten di gran mayoria. Un otro aspecto positivo sigur awor ta e mehoracion di seguridad riba nos beachnan unda cuerpo policial lo tin hopi mas bista, control y lo sanciona si mester haci esaki. Na final preservacion di un di nos atraccion turistico principal ta keda e punto mas importante pa mantene nos pilar economico. Beach Policy ta enfoca riba esnan cu ta haci negoshi riba beachnan, y tin miho orden riba nos beachnan. Pa esnan cu ta haci uzo di nos beachnan esaki lo nifica mas accesibilidad mirando cu nos beachnan ta keda publico pero awor den un forma hopi mas estructura.